

REZOLUTË
PËR VLERËSIMIN E VEPRIMTARISË SË KOMISIONERIT PËR MBROJTJEN
NGA DISKRIMINIMI (KMD)
PËR VITIN 2017

Pas shqyrtimit të raportit të Komisionerit për Mbrojtjen nga Diskriminimi, mbi veprimtarinë e vitit 2017, Kuvendi i Shqipërisë:

- Duke vlerësuar se Komisioneri për Mbrojtjen nga Diskriminimi është një institucion i pavarur që siguron mbrojtjen efektive nga diskriminimi dhe nga çdo formë sjelljeje që nxit diskriminimin dhe se ky institucion ka një rol të veçantë në promovimin e parimit të barazisë dhe mosdiskriminimit në vend;

- Duke inkurajuar dhe mbështetur veprimtarinë e Komisionerit për Mbrojtjen nga Diskriminimi, me qëllim që të garantojë në mënyrë efektive ndalimin e diskriminimit në vend, si dhe mbrojtjen dhe promovimin e të drejtave dhe lirive të njeriut, në veçanti të grupeve të marxhinalizuara në vend;

- Duke vlerësuar rëndësinë që ka zbatimi i rezolutave të Kuvendit të Shqipërisë për veprimtarinë e Komisionerit për Mbrojtjen nga Diskriminimi;

Kuvendi i Shqipërisë konstaton se gjatë vitit 2017:

- Edhe pse ka një rritje të numrit të ankesave të regjistruara pranë KMD-së, në raport me vitin e kaluar, numri i ankesave për shkak të gjinisë, aftësisë së kufizuar, orientimit seksual dhe identitetit gjinor është ende i ulët.

- KMD-ja duhet të luante një rol më proaktiv në fillimin e hetimeve administrative të nisura kryesisht.

- KMD-ja ka vijuar ndërgjegjësimin dhe informimin e shoqërisë në disa qytete të vendit përmes sesioneve informuese mbi zbatimin e ligjit për mbrojtjen nga diskriminimi.

- KMD-ja ka propozuar disa rekomandime legjislative, me qëllim përafrimin e legjislacionit ekzistues dhe miratimin e legjislacionit të ri me parashikimet e ligjit “Për mbrojtjen nga diskriminimi”, si dhe me aktet ndërkombëtare të ratifikuara nga Shqipëria në këtë fushë.

- Numri i vendimeve me konstatim diskriminimi dhe numri i rekomandimeve të dhëna nga Komisioneri për institucionet publike dhe subjektet private është i ulët në raport me situatën e diskriminimit në Shqipëri, paraqitur në raportin vjetor nga Komisioneri.

- Në kuadër të zbatimit të projektit IPA të BE - KE-së, u realizuan komponentë të projektit si: hapja e 3 zyrave rajonale të KMD-së; hartimi i strategjisë së veprimtarisë së KMD-së; përmirësimi i procedurave të brendshme nëpërmjet rishikimit të rregullores së KMD-së; ndërtimi i një *database* elektronike për çështjet; analiza dhe hartimi i rekomandimeve për përmirësimin e ligjit “Për mbrojtjen nga diskriminimi”.

- Ka hartuar, publikuar dhe shpërndarë materiale ndërgjegjësuese mbi ligjin për mbrojtjen nga diskriminimi në fushën e arsimit, punësimit dhe shërbimeve.

- Aftatet ligjore të hetimit dhe shqyrtimit të ankesave, jo në të gjitha rastet janë zbatuar.

- Edhe pse janë ndërmarrë veprimtari të shumta në lidhje me monitorimin e zbatimit të ligjit për mbrojtjen nga diskriminimi në fushën e punësimit në institucionet publike dhe në sektorin privat, nuk është paraqitur një raport i detajuar mbi këto çështje.

- KMD-ja nuk ka përfunduar realizimin e monitorimit të aksesueshmërisë së personave me aftësi të kufizuar në fushën e të mirave dhe shërbimeve, arsimit dhe punësimit.

Kuvendi i kërkon Komisionerit për Mbrojtjen nga Diskriminimi për vitin 2018 fokusimin në këto drejtime:

- Të ketë prioritet zbatimin e rekomandimeve të rezolutës së Kuvendit për vitin 2017.

- Të bëjë përpjekje të thelluara për zbatimin efektiv të ligjit “Për mbrojtjen nga diskriminimi”, nëpërmjet zgjerimit të grupeve përfituese, rritjes së numrit të rekomandimeve drejtuar institucioneve publike dhe sektorit privat.

- Të ketë rol proaktiv në evidentimin e rasteve të diskriminimit, duke rritur numrin e çështjeve të nisura kryesisht.

- Të vijojë përpjekjet për konsolidimin e mëtejshëm të rolit të tij, lidhur me rastet e paraqitura në sistemin gjyqësor, për zgjerimin e grupeve përfituese, në përmbushje të qëllimit dhe objektit të ligjit, duke pasur në vëmendje reformën në sistemin e drejtësisë.

- Të propozojë ndryshime dhe përmirësime ligjore, të kuadrit rregullator në fushën e barazisë dhe mosdiskriminimit, që rrjedhin prej analizave studimore të rasteve të shqyrtuara nga KMD-ja, si dhe rekomandimet mbi përmirësimin e ligjit për mbrojtjen nga diskriminimi.

- Të organizojë në vazhdimësi veprimtari gjithëpërfshirëse sensibilizuese, në zonat urbane dhe rurale për të rritur ndërgjegjësimin e shoqërisë, institucioneve shtetërore dhe subjekteve private mbi format e diskriminimit dhe mekanizmat ligjorë për mbrojtje efektive nga diskriminimi.

- Të respektojë afatin ligjor në shqyrtimin e çështjeve, në përputhje me ligjin “Për mbrojtjen nga diskriminimi”.

- Të realizojë monitorimin e aksesueshmërisë së personave me aftësi të kufizuara në fushën e të mirave dhe shërbimeve, arsimit dhe punësimit.

- Të ketë rol më aktiv në media, me qëllim promovimin e luftës kundër diskriminimit, si dhe përmes ofrimit të informacionit për zgjidhje të rasteve të diskriminimit nga ky institucion, me qëllim rritjen e aksesit dhe të besimit të publikut për institucionin e KMD-së.

- Të garantojë transparencën institucionale përmes përditësimit të faqes zyrtare të institucionit, me të gjitha aktivitetet institucionale, si dhe publikimin në vazhdimësi të të gjitha vendimeve, rekomandimeve, raporteve etj.

KRYETARI
Gramoz Ruçi

Miraturar në datën 19.4.2018